

摘藻堂四庫全書薈要

集部

欽定四庫全書薈要

集部

道園學古錄卷三

四

詳校官助教臣謝登雋



欽定四庫全書會要卷一萬六千三百三十

集部

道園學古錄卷三

在朝藁三

元 虞集 撰

芝亭永言

律詩七言

送袁伯長扈從上京

日色蒼涼映赭袍時巡母乃聖躬勞天連閣道晨留輦  
星散周廬夜屬橐白馬錦韉來窈窕紫駝銀甕出蒲萄

從官車騎多如雨  
祇有揚雄賦最高

代祀西嶽至成都作

我到成都纔十日  
駟馬橋下春水生  
度江相送荷主意  
過家不留非我情  
鷓鴣輕筏下溪足  
鸚鵡小牕知客名  
賴得郫筒酒易醉  
夜深衝雨漢州城

贈星上人歸湘中

潭北湘南無影樹  
一花吹度海門潮  
天香滿室定初起  
雲氣上衣身欲飄  
寶月夜寒龍在鉢  
銀河秋近鵲成橋

豈無一箇邛州竹與爾松根共寂寥

子昂秋山圖

翁昔少年初畫山丹楓黃竹雜潺湲直疑積雨得深潤  
不假浮雲相往還世外空青秋一色牕中遠黛曉千鬟  
瀛洲雞犬同人境尚想翁歸向此間

題黃竹村所藏畫卷

雪後城陰雪一坡寒梅疎竹共婆婆經行不覺籃輿遠  
點染還疑綵筆多蜀棧煖雲生野樹匡廬晴照落江波

商公已老高公死惆悵誰人奈汝何

過池陽與周南翁同知

使過池陽聞上日好懷浩蕩為君開江干維楫車馬集  
亭上持盃風雨來通夜魚龍聽語竟明年鴛鴦憶朝回  
九華秋色翠可食為問謫仙安在哉

安慶路雙蓮寺得上人超然亭

超然之亭何所超雙蓮孤塔共岩堯城頭疎雨散花至  
江外斷雲將樹朝晨飯舊從香積化晚鐘常送海門潮

尋原悵望空歸去此地安禪試往招

謝茅山主者贈白羅氅衣請為作大洞祖宗師四

十五贊

鶴氅裁成雪色新仙翁持寄感情真清高自此全拋俗  
寬博由來穩稱身佩玉洞聞雲外響劔光飛射日中塵  
畫圖寫向羣真裏便是揮毫贊詠人

憶莫京甫廣憲經歷

延春閣下承恩日是我經帷侍講時方擁青編臨綺席

金日... 卷三  
遙看朱紱拜丹墀風微細草鳴珂珮日煖飛花近鬢絲  
上憶遠人常軫念莫言南海是天涯

集與諸公遊尚書何公山莊公孫斯明先為剪薙  
荆榛并致酒饌遂得瞻敬尚書墓道盡日乃還偶  
成四詩酬斯明兄弟并簡同遊者

盛德高年陟泰階歸尋仙隱石樓開舊聞前引朱衣吏  
每為行吟綠逕苔夜色園林瓊圃樹春寒庭館石湖梅  
誰家今有賢孫子黃菊高秋與客來



先君夙有登臨志老去無能共往還  
敢謂菊華憐寂寞  
許教筇竹歷孱顏地高天近惟秋好  
雲淡風輕盡日閒  
早晚涪翁酬素約更從几杖一躋攀

石梯一逕仙凡交過此先見蒼崖坳  
幽穿斗角潛蛟窟  
危出雲根棲鳳巢題字百神驚  
澗底嘯歌衆籟越林梢  
重吟仙伯石樓詠一解齊人山鬼朝

黃姑仙崖置屋牢我躡飛磴如猿  
揉環山翠黛是城郭  
平地白雲皆海濤人頭關上走馬  
健仙掌峰前飛隼高

願得金丹換毛骨三清八極共遊遨

黃氏妹之墓余以他故不及送之既墓之明日仲  
常弟與譚元之表姪述事興懷形諸詠嘆後十餘  
日始得併見諸公和章集憂患之餘觸事易於傷  
感俯仰存歿不覺清涕之交頤也依舍弟韻亦述  
二章一以示黃氏諸甥一以寄元之表姪

寒泉涓涓山木秋予弟行役荒原頭忍聽諸甥哭慈母  
浩將孤淚灑新丘山川神氣蚤晚復珠壁輝光日夜浮

不惜衰年待爾輩受成積德過岑樓

憶別高堂十五秋不堪俯仰雪盈頭翁時贈玉歌清渭  
子正將車從太丘久矣孤懷成寂寞勗哉古學矯虛浮  
每看舍弟承咨辨如見從容月滿樓

題故太子少傅翰林承旨李野齋幽居圖

車蓋歸來托遠林魯山窻萃魯原深漁樵相識頻分席  
賓客時過共賜金百歲儀刑猶近古五朝文物至于今  
披圖相見登臨地松滿徂徠起夕陰

送江聲伯

家近茅峰無百里羨君來往及清秋每看丹井晨光起  
幾見龍池雨氣浮白髮紅塵嗟我老素書玉訣使人愁  
仙都羣老渾相識定着雲裘訪羽丘

歐陽元功待制入院後僕以兼領成均辰酉甚嚴  
絕不得相見今夜當同宿齋宮賦此先寄并東謝  
敬德脩撰

學省初兼禁直稀故人同署却相違食餘首宿承朝日

坐候棠梨過夕暉

成均堂東有棠梨樹日影至則師生始散二十餘年矣

預喜奉

祠秋寺燭定知催襍早朝衣  
今晨瘦馬經門巷想擁青  
綾尚掩扉

次韻張蔡國公淡菴青山寺詩

相國觀山負夙期聖恩祗許暫相違  
身隨雲影留三宿  
心了泉聲絕百非  
開士談空依寶樹  
野人耕雨薦山薇  
雙龍深護安禪處  
繞坐諸天近紫微

次韻國子監同官

坐隱烏皮髀肉消諸生應笑懶邊韶階前老馬隨秋草  
袖裏遺編俟早朝乞米西隣晨有粥留家南國暑無綃  
經明亦是歸耕好清夢無時萬里橋

學官南直禁垣陰假寓唯愁兩壁沈一曲鏡湖遺老事  
三年經幄小臣心銀河回夜天逾近草徑迎秋露轉深  
珍重鄉人居巷北時能來往和鳴琴

次韻馬伯庸寶監學士見貽詩并簡曹子貞學士  
燕信臣待制彭允蹈待制

禁廬曉直夾城西，經筵龍光映壁奎。  
繞閣浮雲飛野馬，當階生草伏馴麇。  
雷行已識天無妄，風烈唯聞帝弗迷。  
徒積寸誠無補報，每還冰署欲雞棲。

其二

奉節通宵虎帳西，重光貫玉護文奎。  
賜餘分食兼羔雉，侍側專茵雜豹羸。  
樂事易成團月怨，吟情深入五雲迷。  
上林更有高枝在，彩鳳還來擇舊棲。

鼇峰者國史院庭中石名也，伯寧御史為僕言自

其先公時與諸老名勝賦詩者蓋數百篇今玉堂  
無本而御史家具之且曰峯所托差低盍稍崇  
其址乃八月五日既克如命因賦此以報且請錄  
示舊詩補故事以傳云

視草堂前石一拳何人移置自何年久憐翠色連重地  
故拔孤根近九天俯仰百年承雨露等閒千尺接雲烟  
故家御史遺書在為錄鼇峰舊賦篇

進講後侍宴大明殿和伯庸贊善韻



丞相承恩自九天講臣春殿秩初筵養賢敢謂占頤象  
陳戒猶思誦抑篇既奏文韶兼善美豈無后稷暨艱鮮  
願推餘澤均黎庶樂只邦基億萬年

劔履歸來帶玉瑤元臣促召不崇朝盍簪誠與朋求助  
納約須從牖向招御柳新條臨畫殿仙桃曉色上春潮  
校書寂寞揚雄宅亦賦凌雲麗九霄

十一月二十夜思仲常弟

江梅應發去年叢叔也俄為畢竟空來後去先康節苦

離多會少子瞻窮近書時閱猶疑在舊學重思孰與同  
萬里相從憐季子白頭清淚夜牕中

還京聞訃在秋餘老淚無多眼易枯丹旌到無頻入夢  
佳城得否未收書食貧未已憐孤幼述德無聞愧老夫  
忍讀近緘成永訣為教哀薄趣歸與

次韻道士竇神清賦舜粟

帝德無為保太和歷山遺種有嘉禾想經稷教躬耕法  
正及堯時擊壤歌旆旆九秋新雨露離離千古舊山河

曲肱飲水幾忘肉最憶宣尼感歎多

太乙道士張彥輔族本國人從玄德真人學道妙  
齡逸趣特精繪事為其友天台徐中孚用商集賢  
家法作江南秋思圖東觀大隱蜀虞翁生為賦此  
詩

三年別却釣魚磯晝看新圖夜夢歸石壁蒼松含爽氣  
江沙翠竹弄晴暉西瞻雪嶺家何在東入天台路轉微  
賀監若蒙湖曲賜遍翔千仞振塵衣

贈竇神清歸隱茅山

翩翩歸鶴自遼東，又向茅山擬住冬。  
啄食定依何處竹，結巢應得古時松。  
雪滿空山騎一虎，月明秋水佩雙龍。  
別來彷彿三千歲，亦欲還棲第一峰。

題南野亭

門外烟塵接帝局，坐中春色自幽亭。  
雲橫北極知天近，日轉東華覺地靈。  
前澗魚遊留客釣，上林鶯囀把杯聽。  
莫嗟韋曲花無賴，留擅終南雨後青。

送貢仲章學士奉祠嶽瀆

三十過從今六旬故人唯我兩吟身  
空華作賦相為壽寧復升堂互拜親  
送別轉令嗟影獨思歸從此上心頻  
南湖春滿鷗波綠定擬乘槎往問津

次韻吳成季宗師赤城阻雨

人間伏日當蚤休道上馬車如水流  
神仙不愁風雨夕父老已知禾黍秋  
誰憐司馬久多病惟有杜康能解憂  
北溟之鷗六月息載我八極歌遠遊

次韻伯庸尚書春暮遊七祖真人庵兼簡吳宗師  
賞心不作三春過高興都為百事牽願解蘭舟溪水汎  
思攜藜杖野雲穿真人館在無塵界太尉詩如絕行仙  
花下共遊仍獨往不辭泥醉晚朝天

石渠承雨作流泉中有參差荇菜牽花近飛觴魚駭逝  
柳低步障燕隨穿紅塵朝路常叅吏清晝齋居幾劫仙  
但乞會稽尋賀監酒船一棹水中天

花時宮館多賓客春酒盈缸餼在牽據石發歌風為起

臨流揮翰硯將穿紫髯一去惟憑夢白髮頻搔豈解仙  
賴有看雲高閣在江東烟樹共晴天

一住京華三十年春花秋月謾相牽高情總付珠簾卷  
危坐空餘木榻穿水曲停驂新禊事墻陰題字昔遊仙  
動成陳迹多惆悵安得長生老後天

送宋誠甫太監祀天妃

使者受節大明殿候神海上非求仙廟前水生客戾止  
帷中靈語風泠然麗牲有石載文字沉璧用繅求淵泉

賈生何可久不見海若率職君子還

觸石墜馬臥病蒙恩予告先至上京寄漑之學士  
敬仲叅書

翠幄臨都尚駐郊言瞻龍漠度前茅雨餘草氣千原合  
日下雲章五色交給札脩辭持玉筆賜羹充腹出珍庖  
白頭感遇知何補阿閣清嚴棲鳳巢

趨召顛躓歎目昏旋聞予告荷深恩藥頒西域千金劑  
酒賜初筵九醞尊默憶舊書忘晝永行吟冷暑覺春溫



摩挲素壁光於雪思得參書寫樹根

閒閒宗師和前韻期望過當復用韻以謝

草堂長憶蜀西郊屢卜歸休自折茅  
司馬檄傳驚父老少陵詩苦入神交  
山多美竹深宜屋江有嘉魚遠致庖  
乞得閒身當及早堯時元自有由巢

書卷連床度曉昏懷歸猶復戀君恩  
養生賴得南華論好客時傾北海尊  
山木向秋俱老大海霞迎日共清溫  
蓬萊正與鼇峰接幾見浮雲起石根

雲州道中數聞異香

雲中樓觀翠岩堯載道飛香遠見招非有芝蘭從地出  
略無烟霧只風飄玉皇案側當霄立王母池邊向日朝  
却袖餘薰散人世九天清露海塵飄

次韻楊友直北行道中

蕭蕭戎馬昔升虛壯士吹笳慄不舒關外羽書三月急  
道傍茅舍百年餘沙田雨足仍生黍河水冰消不禁漁  
洛下賈生猶獻策平明立在玉階除

王儀伯叅政見和郊字韻詩復用韻叙謝

龍游宮沼鳳游郊通水明堂不剪茅綿蕤草儀三日具  
大亨饗帝五雲交執輿已信神為馬和鼎寧容祝代庖  
八月涼風張樂地頌聲洋溢播雲巢

聖遠言湮感墊昏河汾千載最知恩垂紳論道稱前古  
束髮明經奉至尊車騎身從游汗漫庭闈心在視寒溫  
朝回未覺歸途晚斗柄西移揭角根

十月十六日奎章奏對回至李漑之學士宅宣旨

行香孔林案上得佳紙因賦此詩并得其鎮紙玉

蟾

聖恩深念魯東家林木蕭條散暮鴉丹詔先令脩古廟  
彤庭即日遣皇華閣中學士馳山驛天上文星絢海霞  
偶為傳宣到書閣就床奪得玉蝦蟆

次韻馬伯庸尚書

邃閣晨趨禁掖西莫街騎馬及雞棲退朝每想花邊散  
得句應從竹上題賜被南宮無宿火齋居方丈有蒸藜

鳳池何似承明近久候文星共聚奎

送甘太史祀名山大川

太史名山閱秘經承恩衣繡許趨庭江頭飛蓋逢春雨  
林下幽人識使星宣室夜深蓮燭絳石渠風煖竹書青  
清朝盛典須成蹟最想遄歸馬馬駟

就甘太史并寄天台武夷太無三君

武夷山裏芝三秀華頂峰前泰一炊湖老每懷鴻去遠  
山人毋謂鳳來遲浮關紫氣緣書住照夜青黎賴客知

金  
卷三  
賀監清狂天所放故令華髮待安期

子昂墨竹

高崖數竹凌風雨老可當年每畫之脩影自憐流水遠  
虛心如待出雲時縱橫鴻爪留沙磧宛轉鶩羣向墨池  
百世湖州仍見此故知王子善參差

二十五日即事呈閣老諸學士

松陰鵲立候宮車風送飛花著白鬚水影漸移簾側畔  
鶩聲祇在殿東隅近床擬進名臣操載筆親題列女圖

太液雨餘波浪動龍舟初試散魚鳧

賦胡氏皆山

萬山起伏如波浪外固中寬故可居日出擁金千仞雪  
雲生納翠八牕虛亭中留客多為酒谷裏成樓更貯書  
朝往莫歸勞杖屨醉翁應不憶環滁

賦碭山成簡卿心遠亭

作亭臨河河水渾草樹繞屋啼鳥聞夢回枕上彭城雨  
目送檐間芒碭雲歸來黃菊有佳色坐老青山無垢氛

但願尊中長得酒曲阿莫問舊叅軍

送全州錄事

清湘郡城公事少錄事官曹盡日閒且可隨雲度流水  
更宜把酒看青山僧前虎跡石苔紫雨裏鳥聲江竹斑  
應會吟詩一百首寄與明年春鴈還

與衆仲助教讀王臨川遺事慨然興懷良上人為  
蔣山善公求送行因為賦此

霜筠雪竹鍾山寺最憶臨川舊所遊病骨荒陂秋澹澹



白頭遺恨思悠悠  
燕歸雲海迷華屋  
鷺起星河近綵舟  
欲託善公重到日  
松間石上試相求

玉堂讀卷

玉堂策士詔儒臣  
御筆親題墨色新  
省樹坐移簾底日  
官壺馳賜殿頭春  
虞廷制作夔龍盛  
漢代文章董賈醇  
書閣莫年偏感遇  
但歌天保答皇仁

謝吳宗師送牡丹并簡伯庸尚書

輕風紫陌少塵沙  
忽見金盤送好花  
雲氣自隨仙掌動

天香不許世人夸，青春有態當牕近。  
白髮多情插帽斜，最愛尚書才思別。  
解吟胡蝶出東家。

和范德機從楊搆進士見寄

清江先生最好奇，十年不出髮如絲。  
田舍每詢歸後計，玉堂今見寄來詩。  
風前雨過林花動，日下雲行省樹移。  
還覓舊遊春欲莫，楊搆為我道深期。

送進士劉聞文廷赴臨江錄事

清江百尺石為城，太華千峰積雨晴。  
官府幾時書帙靜。

漁舟盡日釣絲輕故家好訪春秋學上國多傳月旦評  
頗有老懷煩錄事到州為問范先生

大廷策士問經世之道僕忝在讀卷之列觀諸進  
士所對有感賦此錄以贈別劉性粹中支渭興文  
舉二賢良

昔人有欲問先天林下相期二十年已向塵埃成白髮  
尚從燈火事青編獲麟遂訖春秋後鳴鳥猶聞禮樂前  
春雨未來農事晚獨懷歸計在山田

羅朋友道擢高科拜官還崇仁賦此為別

重溪疊嶂竹交加  
曾著芒屨踏白沙  
名勝多年嗟寂寞  
文章此日羨才華  
青雲步武纔重見  
白屋詩書尚幾家  
鄉邑相逢煩告語  
好敦忠信作生涯

白沙友道居近之昔崇仁有何同父

尚書李公父舍人墳墓故宅在馬國朝六科崇仁舉進士第者惟家弟與友道才二人故云重見所以深期望於來者云

贈趙生

天門一日觀黃榜  
茅屋三年掩素扉  
緗帙蠹魚春雨潤

練囊螢火夜光微  
夢遊朔雪留鴻跡  
思入南山望鶴飛  
會倚宮牆看射策  
上林初日炫朝衣

贈昇龍觀主

榻前親製先生號  
賜與江南謝舜咨  
太華雲開天使下  
少微星動史官知  
龍飛滄海留珠樹  
虎臥丹房守玉芝  
聖主無為千萬壽  
更應築館候安期

訪李真人不遇

退朝花底佩珊珊  
去訪真人曉出關  
芳草欲迷行徑古

長松深護步廊間，蒼龍挾雨得瑤簡。白鹿穿雲致玉環，  
如到天壇看月影。定知清露滿人間。

賦壺洲

傳聞海上有玄洲，曾是安期舊所遊。千頃白雲都種玉，  
一杯弱水不勝舟。魚龍夜護黃金鼎，鸞鵠晨朝紫綺裘。  
波浪不驚星斗近，步虛聲裏度清秋。

完哲篤下第歸蜀

西郊長憶草堂吟，塵外幽居更可尋。奏賦上林春事曉，

携書舊隱歲華深  
濯錦江波紅灩灩  
浣花潭水碧沈沈  
白頭未覺歸歟莫  
待子重來獻好音

吳宗師夢予得山居奇勝特甚夢覺歷歷分明忻然相告賦此

夜來夢我山居好笑我平生豈有之  
野服許辭金殿直  
俸錢足辦草堂貧  
安知蓬島非兜率  
不是匡廬定武夷  
還有勝緣同晚歲  
至人無睡已多時

答李簡伯司業分俎

昔憶同堂肄樂歌朝陽煦煦午風和  
炮羔升俎堆紅玉  
醕酒盈樽汎綠波坐席已成三載別  
交情猶似嚮時多  
尋常飽德寧私我願賦緇衣上禁坡

次韻朱本初訪李漑之學士不遇

城南城北煖塵飛伐木相求苦未歸  
吟到碧桃還細雨  
行尋芳草又斜暉綺牕彩筆題詩徧  
斗帳沉香入袖微  
共載小車勝上馬重遊莫待曉紅稀

寄趙子敬平章



聞道乘閒入翠微，猶愁嵐氣濕人衣。  
道傍野樹飛花盡，溪上春雲作雨歸。  
故舊釣絲輕在手，仙人棋局靜忘機。  
赤松曾許同千載，擬向高秋傍鶴飛。

仁壽寺僧報更生佛祠前生瑞竹有懷故園

聞道故園生瑞竹，試從來使問何如。  
蒼筤獨出千叢裏，翠節駢生數尺餘。  
比管可吹丹穴鳳，長竿莫釣錦溪魚。  
折筵已向靈氛卜，亦說能歸似兩疏。

聞道故園生瑞竹，令人歸興滿江干。  
扁舟不畏瞿塘險，

匹馬誰云蜀道難  
杜甫溪頭花匠匠  
孔明廟裏栢闌珊  
新堂題作歸歟字  
定得臨江把釣竿

聞道故園生瑞竹  
山僧為我重栽培  
百年雨露餘生息  
一日風雲幾往迴  
壠上枯桑烏萃止  
城東華表鶴歸來  
聖恩若許歸田里  
千石清尊為爾開

聞道故園生瑞竹  
吾家孫子好歸看  
佛祠竟日春陰覆  
先隴多年莫雨寒  
門戶淒涼嗟老病  
鄉關迢遞報平安  
重來慎勿勞余夢  
駟馬橋邊據馬鞍

題張太玄為陳升海畫廬山圖

誰向匡廬成舊隱畫中一似夢中看  
千株松樹叅天起一箇茅亭傍水安  
清風空谷傳吟嘯白日高岑生羽翰  
寄語山中陸脩靜葛巾不畏過溪寒

別國史院鼇峰石

秋雨莓苔數尺身文章曾見百年人  
吁嗟一代興王盛付托諸公製作新  
珂野有詩皆在魯泰山無刻更先秦  
鳳麟一去無消息空使駑駘愧後塵

執戟揚郎久不遷  
頻年從幸到甘泉  
賜歸特許先三日  
作賦時令奏一篇  
翠勺娛人花帶露  
貂裘倚馬草橫烟  
殷勤為謝堂前石  
何處來秋共月圓

神鳳琴

鳴鳥人間久不聞  
遺紋欲托斷琴紋  
曾看土鼓歌朝日  
亦共陶樽醉夜分  
五色雲中迎太乙  
九疑山下望湘君  
采詩應被唐風譜  
早晚樓船或祀汾

繼陶居士傳

汲水滔滔蜀嶺高飛蓬千里棘心勞道間化虎作人語  
城上慈烏向子嗥玉樹斷歌殘王氣朱門往事付鴻毛  
將軍莫歎今為庶居士當年已繼陶

謝書巢送宣和瀘石硯

巢翁新得瀘州硯拂拭塵埃送老樵毀壁復完知故物  
沉沙俄出認前朝毫翻夜雨天垂藻墨汎春水地應潮  
恐召相如令草檄為懷諸葛渡軍遙

送蘓伯脩御史

新除御史南臺去頓覺文星闕下稀病起可堪江霧濕  
信還莫待苑花飛千年鳳鳥來阿閣萬里鱸魚出釣磯  
總道揚雄文最古君知頭白久思歸

次韻柯玉文寄別

避弋驚鴻過遠汀啄苔病鶴想華亭  
臨邛枉騎情都盡於越扁舟影更俚  
賓客莫詢温室樹君王猶問楚江萍  
重來賈傅非年少前席從容對夕廷

謝書巢惠梅花

巢翁遠送梅花樹正在東風四日前紅萼無言餘舊雪  
白頭相見又新年喜從嘉樹來江雨憶共香航上海船  
春夜不眠賓客醉只留孤鶴伴清妍

再用韻簡巢翁

豈無尊酒梅花側聞道長齋繡佛前方閣護雲宜煖日  
小車衝雪稱高年願辭閣下金蓮炬但乞湖中菴畫船  
約取巢翁携鶴去鬢毛同白不爭妍

送玉泉長老栗木果

非青非黃粟木果使者西川馬上來  
楚國共疑金橘味  
衛人抵道木瓜栽  
頻婆妙色情懷別  
橄欖餘甘齒頰迴  
歸到玉泉應說法  
試令關老聽轟雷

送王君實御史

頓覺文星闕下稀  
旁人猶道此言非  
東風十日京城雪  
西道三春客子衣  
鶯滿鞦韆川君定  
到鷓啼劔閣我思歸  
千花並繞圖書府  
相待承恩入紫微

寄句曲外史張伯雨



獨抱長鏡管白雲琴心誰錄內篇文清齋三日秋仍瘦  
徧禮羣真夜每分石記恐妨塵外事山經聊許世人聞  
已從司馬求真籙更為通章九老君

寄答馬昂夫總管

白髮先朝舊從官幾年南郡尚盤桓九華山裏詩題徧  
采石江頭酒量寬鴈到京城還日暮馬懷餘棧又春殘  
何時得共鳴臯鶴八月匡廬散羽翰

觀大洞經書與董道士

江東昔有大茅君大藥親令二弟分紺綠俄消頭上雪  
玄黃初合洞中雲雷鳴春谷龍三變月滿秋空鶴一羣  
一落人間成老大何年名字刻瓊文

送劉宗師歸茅山

長松落落千峰雪碧漢寥寥一鶴風十月暫離句曲洞  
早春還謁大明宮君王舊識蒼龍劍圖畫新傳白髮翁  
欲把紫芝歌隱德三茅應聽月明中

與薩都拉進士

當年薦士多材俊忽見新詩實失驚今日玉堂須倚馬  
幾時上苑共聽鶯賈生誰謂年猶少庾信空慚老更成  
唯有臺中馬侍御金盤承露最多情

送歐陽元功謁告還瀏陽

憶昔先君早識賢手封製作動成編交遊有道真三益  
翰墨同朝又十年心似古人機獨敏用周當世德仍全  
雍祠已有蒼崖石欲托高文與代傳

曉奉新書進御床解纓隨見濯滄浪歸鴻不計江雲濶

倦驥空懷野水長竹簟暑風魂夢遠茶烟清畫鬢毛蒼  
籃輿千里宜春道投老相求訪石霜

送王師魯編脩祠南鎮

山陰巖壑多塵迹王事能來況暮春太史好探神禹穴  
老夫先是會稽人海東日出雕闌近湖上風生白苧新  
若得拖樓同晚飯便從賀監卜為隣

次韻楊友直

真館能容客避囂深簾飛絮畫寥寥數枝芍藥誰相贈

一束生芻故可招坐定驚雷經席上酒闌纖月在林標  
何由長共陶弘景聽取松風作鳳韶

題東平王與盛熙明手卷

宋宣和手勅一通卷首題識四字我朝英宗皇帝御  
書也帝嘗以至治三年正月十五日幸五華山臣有  
以此書獻者丞相拜珠侍側就題以賜之既歸第曲  
先盛熙明寫金字佛書一帙贊丞相丞相因以此卷  
貽之且語以其故至順三年三月八日熙明屬歐陽

玄記其事於左方

聖代御題前代勅小臣叨備史臣書事業久為人土苴  
文章猶作世璠璣海淪碣石圖空在墓築祁連計已踈  
誰識全燕天所靳萬年形勝帝王居

和馮侍御西山口占

峒堯宮殿水西頭春日時聞翠輦遊霧引旌幢連閣道  
風傳鐘鼓出城樓羣臣頌德金為刻萬歲稱觴玉作流  
避暑醴泉涼氣早旋京應喜大田秋

到先隴為墓人書

未忍他鄉作故鄉  
故因使騎入陵陽  
鄉人共訝聲音似  
客路疑將鬚髮蒼  
親老長懷鄉里意  
孫多宜置墓田旁  
治生自可依諸葛  
數頃膏腴八百桑

八月十五日傷感

宮車曉送出神州  
點點霜華入弊裘  
無復文章通紫禁  
空餘涕淚灑清秋  
苑中苜蓿烟光合  
塞外蒲萄露氣浮  
最憶御前催草詔  
承恩回首幾星周

題煖翠亭

老去唯思臥白雲一亭萬竹喜初聞  
波回曉日鴛鴦並沙散晴烟翡翠分  
把釣左泉歸衛女乘舟北渚望湘君  
誰能獨采薇盈袖却道高寒思不羣

送許有孚赴湖廣提舉

奉詔掄文秘殿西才華知合藉金閨  
思親浩蕩江波遠戀闕遲回苑樹低  
望鶴樓前移綵鷁吟詩花底聽黃鸝  
歸來尚覺春風早鴈字充庭玉筍齊



賦石竹

積雪初消萼綠華東風吹動絳綃霞  
龍噓石氣千年潤鶴過林陰一逕斜  
刻字欲尋金錯落折旌如織翠交加  
綺牕坐對吹笙暖未覺人間歲月賒

集為多爾濟慎齋平章題紫微亭用王右丞語也  
并賦詩一首奉寄

右丞昔向終南住獨對南山賦紫微  
春雨乍收原上牧晚晴仍見谷中歸  
好留杜牧為賓客更覓園公共蕨薇

聞道新亭多雅興  
想持樽酒看清暉

賦碧筠堂

藹藹江東雨後雲  
碧筠堂上注芳尊  
眉山老去無賓客  
番水春生有子孫  
團扇晚涼留翠黛  
疎林纖月對黃昏  
問誰吹得參差玉  
為斲蒼苔向石根

奉同吳宗師賦蔡七祖新齋

城南烟樹聽鶯啼  
石上莓苔覓舊題  
自有琴心傳內景  
更將書帙事幽棲  
晚來相鶴風生竹  
雨過籠鵝水滿溪

蜀客草玄成底事  
蕭條白髮愧青藜

次韻吳宗師

硯池滿貯薔薇水  
罌腹輕磨翡翠釵  
仙苑烟雲隨地煖  
道山風日向春佳  
巢笙夜夜鳴金屋  
飛鷗時時步玉階  
祇恐江頭花事晚  
謾勞車馬賦茅齋

寄來鶴亭主人

德清舊館何時到  
雨後春泉定滿池  
綠字久無弘景信  
紫苔應長少霞碑  
數峰烟樹天垂野  
千頃鷗波雨散絲

海內交遊多老去為誰溪上放船遲

送王中夫赴安慶教授

太行積雪都消盡船到舒州水正高  
江樹連城分野色門生加豆薦溪毛  
尋原自去書山石問字誰能載醴醪

為覓種椒張處士早收丹實待歸舫

予延祐己未秋南歸安慶城東有張

教授與予同舟從者得椒實數升至江右種皆成予復來京師又十數年山中椒已無存者可為求種秋過江上行取之爾

送張兵部巡視運河

畫橋冰判動龍舟鴨綠粼粼出御溝使者旌旗穿柳過  
人家鳧鴈傍溪浮桃花吹雨春牽纜江水平堤夜唱籌  
應有餘波方浩蕩不令歸楫恨淹留

謝吳宗師惠墨

念我衰年不廢書錦囊古墨送幽居明牕塵影丹同熟  
玄圃雲英玉不如敢為文章勝虎豹祗應箋註到蟲魚  
研磨不盡人間老傳與兒孫尚有餘

再和

慣見天真按筆書  
七言宛麗出閒居  
誰云太璞無存者  
藏在丹房已久如  
寫韻臺虛人跨虎  
換鵝池暖水生魚  
玄霜比似金丹秘  
祇得刀圭便有餘

家傳戈法負遺書  
得墨深將藻繪居  
華采每慚誇既往  
平安聊遣問何如  
畫殘翠黛愁蛾綠  
寫得黃庭辟蠹魚  
鬚髮如霜還可染  
硯池不敢棄君餘

三用韻答巢翁就以奎章賜墨贈之

隣父長思長史書  
不辭頻謁惱巢居  
臨池三月玄霜盡

對月千篇白雪如賦敵洛波翔翠羽歌成湘浦媵文魚  
故分瀘石松烟色猶是奎章舊賜餘

四用韻寄吳宗師奉祠城東岱祀其一謝夏真人  
送海棠一枝

休奉東封遠獻書神宮咫尺九重居香飄秘殿人顯若  
靈降方壇樂翕如水上祓除祠候燕雨中歸牧夢占魚  
此時最憶風雲地濯濯清沂詠歎餘

定計歸來已束書高齋虛寂似禪居好花送與春風共

病目愁看宿霧如四月落林多野筍半陂流水足溪魚  
今春又過今秋早一飯跣趺不願餘

謝吳宗師送牡丹

人人看盡洛陽花誰似堯夫小小車高閣每煩君實望  
西街還過伯淳家東風寒食炊烟散燕子空梁暮景斜  
最憶青城坪上樹樵人祇向擔頭誇

題着色山圖

江樹重重江水深楚王宮殿在山陰白雲窈窕生春浦



翠黛嬋娟對晚岑  
宋玉少時多諷詠  
江淹老去倦登臨  
扁舟却上巴陵去  
閒聽孤猿月下吟

題熊太古畫

亭上長松三百丈  
何人可以此經過  
窮冬藜杖出同谷  
清夏籃輿還曲阿  
棲鶻每來從島嶼  
老猿時復下藤蘿  
王維韋偃久不見  
病目摩挲愁奈何

送趙伯常自中臺出貳淮憲

淮南地沃偏宜麥  
况可扁舟弋鴈鳧  
此地正須能賦客

中臺新剖使君符  
山城過雨驚春盡  
野老扶藜到日晡  
行部若臨江岸濶  
烟波冉冉有漁夫

送淨慈書記

寒梅的的西來意  
翠竹青青劫外春  
日出碧雞山作霧  
臺空彩鳳地無塵  
八年寫遍湖光好  
萬里歸來月色新  
我在錦官城裏住  
白雲滿屋便為隣

送趙秉彛因王君實末章以起句

朝裏儒冠盡白頭  
斯言三復使人愁  
芳叢獨見芝蘭樹

蚤歲不矜穉稗秋藏書靈谷訪遺老把釣清江懷故侯  
大中梁棟小榱桷匠氏尋引還相求

題畫

緝熙殿裏御屏風零落誰收百歲中錦樹總含春雨露  
畫橋猶是舊青紅花開陌上懷歸燕潮落江頭送去鴻  
何似綠波生太液絳桃風急綵船東

城東觀杏花

明日城東看杏花叮嚀兒子蚤將車路從丹鳳樓前過

酒向金魚館裏賒綠水滿溝生杜若煖雲將雨少塵沙  
絕勝羊傅襄陽道歸騎西風擁鼓笳

題張希孟中丞送畢提點申達卷後

十年七聘不還朝起為饑民夜駕軺嘉樹百年誰忍伐  
生芻一束不能招西川華屋交游少北海清樽意氣消  
欲寫濟南名士傳泉聲山影晚蕭蕭

寄海南故將軍

海上風來五月秋晚涼應上木蘭舟金盤丹荔生南國

玉梳清冰出北州  
狂客醉時花作陣  
美人歌罷月如鉤  
期門舊識將軍面  
從獵還披翠羽裘

次韻宋誠甫學士城南訪病暮歸

騎馬城南覓舊題  
飄蕭蓆帽碧雲低  
東風花柳過韋曲  
落日兒童唱大堤  
繡閣豈無和玉髓  
錦囊還有鑄金蹄  
歸來吟轉樓頭月  
池冷芙蓉翡翠棲

寄泉南三老人

春城連海樹扶疎  
中有幽人八十餘  
餘庾信流傳江左賦

伏生零落濟南書  
鄰翁社舞尊多酒  
弟子晨炊饌有魚  
前代衣冠今絕少  
故懷三老載安車

次韻答衆仲助教相壽之句

老牛無力服柴車  
道遠鞭驅未到家  
碩果當留霜後樹  
寒梅深辨雪中花  
青城萬里懷空谷  
滄海千年望太霞  
賴有良朋相慰藉  
釣竿隨分倚江沙

題康里子山尚書凝春小隱六韻

羣玉府中香滿袖  
凝春亭裏看花開  
綵雲近席微風動

紅日當牕好客來  
西海珊瑚階下長  
東家蝴蝶雪中回  
竹深每聽尚書履  
池煖時分太液盃  
鳳味浮烟金錯落  
鶯羣隨水白氈毳  
人間應得幽封帖  
青李林禽繞舍栽

次韻杜德常博士萬歲山

秘閣沈沈便殿西  
頻年立此聽春鷗  
風搖翠岸新生柳  
雨浥銅池舊產芝  
玉几由來常咫尺  
衡門此日遂栖遲  
申生欲去柴車在  
杜甫長吟雪鬢垂  
墨沼遊魚翻宿藻  
畫檐飛燕翳晴絲  
山中竹簟涼如水  
應夢釣天九奏時

次韻宋顯甫

御溝雪融三月初  
鳧鷖鴻鴈總來居  
葡萄水綠可為酒  
楊柳條青堪貫魚  
迤邐天河起箕尾  
滉漾雲海浮青徐  
舟前花落傍飛燕  
隄上風來濕舞裾  
翠輦時留金駉裏  
錦波不着玉芙蓉  
臨流宋玉偏能賦  
莫待東都客問予  
絕句五言

燕陳公子宅贈燕學士

落日照大隄  
花間聞馬嘶  
城頭鼓角起  
相送五門西



宣和墨竹寒雀

灑墨寫琅玕深宮春晝閒蕭條數枝雪不似紆千山

上馬

眼昏身手鈍上馬怕風沙祗好扶藜杖循籬看落花

題旦僉司所藏慧甄腐瓜行蟻圖

瓜腐來螻蟻梧生致鳳凰荒園空宿雨阿閣自春陽

雙鴛圖

戢翼石梁陰秋風日夜深使君莫行野江水蕩人心

畫扇雀竹

啄粟野田莫飛鳴亦求雌誰家江上雨發船歌竹枝

畫扇柳蟬

不食遂終日長吟如老翁金盤九秋露玉樹一絲風

畫雙蝶

舞罷庭花落池邊看睡鳧無端雙蛺蝶飛上繡羅襦

商德符畫松

松根生茯苓松葉纏兔絲服之可長生歸哉南山陔

河梁泣別圖

落葉滿長安  
秋風漢節還  
裁詩寄歸鴈  
三月到天山

題蒙古松壑書

長風壑中來  
吹雨灑高竹  
憶昔曾見之  
終南跨黃犢

捕魚圖

網罟日相從  
天寒澤國空  
釣竿長倚樹  
老却渭川翁

子昂畫

拂石藪竹間  
采蘭幽林下  
遊子憺忘歸  
何以遺遠者

右

松上一枝雪竹間千本  
蘭江濤嗟遠道風雨憶春寒

雜寫

韓子登華封縣令捐其階  
噐呼始得下亦不傷雅懷

右

粵人善操舟先去令人愁  
今年水未落不見尊鱸秋

右

狂罵人不怒徒然傷天和  
問君丹丘月當勝白蘋波

右

雲間陸士龍寧知千金貨文章倘有取論薦何愧辭

右

長鬚一握雪昏目九重雲不為成去計猿鶴皆怨紛

右

夕望姑蘓月晨瞻太湖波金章還闕下隨意覓漁簑

右

貪祿戀君恩三年金馬門願於堯舜世頭白老人村

題柯敬仲雜畫

北苑今仍在南宮奈老何青山解浮動端為白雲多

右

雨過蒼苔石雲生埜岸泉幽懷春冉冉稚子秀娟娟

右

鐵石餘生色冰霜作曉妍春雷明日起何處尚龍眠

右

雨過黃陵廟蒼梧雲正愁何時倚虛幌對此滿林秋

右

江上秋漠漠風雨晚蕭蕭千載誰相識惟應待老樵

右

昔過笱簞谷鉤衣石角斜擬尋龍作杖拾得上天槎

右

黃金千瑣甲瑠玉六簾鉤雨送鴛鴦夢烟籠翡翠愁

右

娟娟生玉潤楚楚作金聲羽扇迎風定羊車過月明

右

峽口春雲重江南夜雨多水深桃葉渡風急竹枝歌

右

蒼涼初出日黃落早知秋不遇采芝客寧知叢桂幽

右

明堂要梁棟大匠取修直鬱屈崖石間秋風動蕭瑟

右

平陸蒼龍起近山生遠烟前村三萬頃明日水平田



右

莓苔生石路翠竹自交加  
不惜青鞵濕臨流踏白沙

右

昨夜采樵去偶逢三尺枯  
山人不到海不識是珊瑚

右

瀟灑一枝新惟堪掃淨塵  
白雲在窓戶留作老僧隣

題李漑之學士湖上諸亭

烟蘿境

玉女乘烟霧松間采薜蘿飛行了無跡明月送空歌

金潭雲日

金沙灘上日潭底見雲行祇有琴高鯉時時或作羣

漏舟

春水如天上秋潭見月中如何列禦寇猶欲待冷風

紫霞滄洲

洞裏琴鳴澗洲前棹入雲擬尋雲谷叟同訪武夷君

秋水觀

湖深山影碧天淨月光空幸自無波浪蘋花謾晚風

無倪舟

三周華不注水影浸青天不上銀河去空明擊棹還

紅雲島

日出湖邊曙雲生島上紅綵舟移曲岸白塵對微風

蕭閒堂

受業蕭閒老令人憶稼軒高堂何處是湖曲長蘭蓀

松關

黛色浮空表蒼髯積雪邊雞鳴從此度掉臂向秋天

大千豪髮

善聽返無聲善視入無覩還將一緒雲散作萬山雨

觀心

炯炯燈留室微微息若存仰探當月窟俯察識天根

題熊太古畫

路過秦時檜家留蜀道山長安都看徧回首入柴關

右

海內此亭古，幽村春事多。  
扁舟歸未得，江水已生波。  
敬仲竹樹古石

雲樹寒逾勁，霜筠晚更脩。  
玄雲動蒼石，令我憶湖州。

六言

題柯博士九疑秋色圖

余獨游兮洞庭野，雲徘徊兮天將雨。  
望九疑兮不可見，結幽篁兮聊延佇。

題柯博士畫

登孤丘而望遠見江上之楓林放余舟兮澧浦何天高  
而水深

道園學古錄卷三

欽定四庫全書薈要卷一萬六千三百三十一

集部

道園學古錄卷四

在朝藁四

元 虞集 撰

芝亭永言

絕句七言

次韻竹枝歌荅袁伯長

沙禽東去避網羅  
蕩舟相逐如遠何  
越山青青越女白  
從此勞人魂夢多

春江風濤苦欲歸東盡滄溟南斗低明年白日百花靜  
憶昨琴中烏夜啼

燕姬當壚玉雪清簫中吹得鳳凰聲不及晴江轉柁鼓  
洗盞船頭沙鳥鳴

木芙蓉

九月襄王宴渚宮霓旌翠羽度雲中滿汀山雨衣裳濕  
宋玉愁多賦未工

水芙蓉



長洲宮沼醉西施蕩漾蘭舟不自持願奉君王千歲樂  
一盤清露玉淋漓

送四川憲使

晚趨嚴召直承明侃侃論思歲未更國老不應持節去  
鄉人徒羨過家榮

錦溪園裏千尋竹夏日移床就綠陰烏帽練衣叩竹杖  
閒來誰與共清吟

已歎玄經返墨池復愁國史奉嚴祠離鄉遊子歸仍晚

獨對東風惜鬢絲

小東郭外今無舍  
萬里橋西况問田  
不恨錦官非昔日  
但尋玉局是何年

龍游峽口芝千本  
仙井山中玉數窠  
老去首丘天所念  
未甘孫子祇東南

曹將軍馬

高秋風起玉關西  
踣鐵歸朝十萬蹄  
貌得當時第一匹  
昭陵風雨夜聞嘶

舊屋

舊屋已屬他人家  
臨風且復立江沙  
欲從子雲訪墨沼  
更向少陵尋浣花

誰家

誰家結屋倚江湍  
五月湍聲入座寒  
種樹已堪維馬騎  
開軒即可把漁竿

馬圖

昔在乾淳撫蜀師  
賣茶買馬濟時危  
鄉人啜茗同觀畫

解說前朝復有誰

先君太史棄諸孤之四年集來吳門省連州府君  
大墓始見叔父南山翁翁與集同出太師雍國公  
盖四從矣翁曰後會未可期幸留數語識歲月翁  
方客授外鄉又以推人生年月日論禍福以助道  
故不能久留城中敢用賦此以承命云耳

玉屏古栢與天齊使過于今又七期各道遺書向江上  
西風江水鬢絲絲

玉遮墓下有諸孫東望滄波每斷魂泣血三年餘喘在  
更將哀淚灑荒園

族人散處江南郡不識音容但記名世澤須令孫子憶  
故家今幾尚簪纓

王母圖

瑤草春深晝日間靈芝清露自怡顏雙成吹徹參差玉  
八駿人間去不還

偷桃小兒癡且妍恃恩無賴更蒙憐竊翻雷電天公怒

風雨落花紅九川

黃竹遺墟白雪高空桑戴勝向晨噪茂陵多欲非仙器  
枉賜金盤五色桃

西望瑤池斗柄旋金明水淨月娟娟請觀阿母神仙籍  
名在龜山第幾篇

竹杏沙頭鴻鵠

蛺蝶飛來石竹藪羅襦曾試繡紋重荷花啼鳥銀屏暖  
卧看牕間唾碧茸

閩州海棠

閩州城南天下稀  
海棠參天鸚鵡飛  
百年高興付蕭散  
老著西江何日歸

畫猿

冷泉亭下呼常到  
巫峽舟中聽更愁  
老石枯藤還見汝  
因懷經處思悠悠

記夢中詩三首

祝融君紫虛  
君率子廉

出海雲霞九色芒  
金容滉漾水中央  
向曾賜服玄洲玉  
今結蕭臺五鳳章

飛步崔嵬上九宮  
親題彩筆篆明虹  
玉樓臨海連天碧  
待子扶桑鶴出籠

失脚漁磯返棹遲  
幾回石上候來期  
老翁岩下諸年少  
總解題詩笑鬢絲

題周東陽進士為南郭園林記後

南郭名園纔隔縣  
好添花竹及清時  
歸來未老柴車在



百里尋春定可期

維摩

二士同開不二門  
是何境界擬評論  
若為普供諸香飯  
貴得薰聞悟識根

錢舜舉折枝芙蓉

白髮多情憶劔南  
秋風溪上看春酣  
剪來一尺吳江水  
擬比千花濯錦潭

商德符小景

商公昔者觀秦蜀劔閣崢嶸筆底開又向江南住三載  
不為廬阜即天台

天歷改元十月題于昂馬

朝廷無事日從容太僕承恩出九重前代王孫今閣老  
只畫天閑八尺龍

寄馬伯庸尚書

江上河豚次柳花三月淮舡當到家賜金盡賣買田舍  
坐對八公吟日斜

商德符小景

五老峰前屢往來，紫雲如蓋蔭崔嵬。  
十年京國頻看畫，最愛高僧坐石苔。

賦故宋李忠襄公植烏石渡舊隱

窈窕幽篁帶薜蘿，青春白日坐蹉跎。  
試詢烏石江頭水，寧有微波接汨羅。

訪杜弘道長史不值道中偶成

雨泥輕塵道半乾，朝回隨處借花看。  
牆東千樹垂楊柳。

飛絮時來近馬鞍

聽雨

屏風圍坐鬢毵毵  
絳蠟搖光照暮酣  
京國多年情盡改  
忽聽春雨憶江南

春雲

春雲漠漠度宮城  
樓雪初融水未生  
行過御溝成久立  
起頭枝上有流鶯

與趙子期趨閣

日出風生太液波  
畫橋千尺彩船過  
橋頭柳色深如許  
應是偏承雨露多

玉堂讀卷雜賦次韻

待漏宮門聽鑰開  
袖中進卷總賢才  
奏名殿裏千花合  
傳勅階前好雨來

千花覆檻柳垂絲  
晝刻傳呼淑景遲  
聖主自觀新進策  
侍臣簪筆立多時

文章光燄貫長虹  
來者無窮去者空  
頭白眼昏心力  
盡

高堂深夜燭搖紅

題陳衆仲助教送人之官南平序後

我憶錦溪最上原  
春雲為雨日行天  
何時獨上溪邊閣  
不待冷風已洒然

院中獨坐

何處他年寄此生  
山中江上總關情  
無端繞屋長松樹  
盡把風聲作雨聲

題歐陽原功少監家柯敬仲畫

涔陽日日水生波翠袖黃裳晚擢過珠樹月明花婀娜  
鳳毛春暖錦婆娑

楚宮朝雨過江潭燕燕新來試浴蠶庭下錦衣皆稚子  
牕前秀色是宜男

子昂人馬圖

綠衣奴子十七八面如紅玉牽馬過繡簾美人時共看  
堦前青草落花多

紹興間臨安士人有賦曲一春長費買花錢日日

醉湖邊玉驄慣識西湖路  
驕嘶過沽酒樓前紅杏  
香中簫鼓綠楊影裏鞦韆  
晚風十里麗人天花壓  
鬢雲偏畫船載得春歸去  
餘情付湖水湖烟明日  
重扶殘醉來尋陌上花  
鈿思陵見而喜之恨其後  
疊第五句重攜殘酒酸寒  
改曰重扶殘醉因歐陽  
原功言及此與陳衆仲尋  
腔度之歌之一再董此  
字求書其事因書之并繫  
以此詩

重扶殘醉西湖上  
不見春風見畫船  
頭白故人無在者



斷堤楊柳舞青煙

題畫古木

高秋木落洞庭空  
岳陽城南多晚風  
蛟龍夜護玉壇古  
劍影長留明月中

八月十五日得旨先歸驛騎在門復召還草詔十  
七日至桓州驛題壁

烏桓東望天無際  
祇有銀蟾出海頭  
不得吹簫送清夜  
禁城鐘鼓度中秋

子昂幽蘭脩竹

舊時長見揮毫處脩竹幽蘭取次成  
欲把一竿苔水上  
鷗波千里看雲生

子昂竹石

數尺琅玕近玉階連昌宮苑少人來  
庶庶蒼石如人立  
恐有題名上紫苔

畫竹石

井中墮却翡翠釵海上拾得珊瑚鈎  
蒼龍過雨影在壁

斷雲零落令人愁

簞簞谷中春事晚  
老鶴俛啄莓苔生長鳴  
戛戛雨氣潤  
舞羽脩脩山月明

酬書巢送棕箒

積雨蒼苔路不分  
松華盡日落紛紛  
塵埃滿袖歸來晚  
誰與柴門掃白雲

子昂畫

棠梨枝上白頭翁  
墨色如新最惱公  
直似故園花石外

銅盤和露寫東風

送上黨長

春雨人參長紫苗  
縣庭無事坐終朝  
俯看雲氣千山表  
野有新田市有謠

畫馬

蕭條沙苑貳師還  
首藉秋風盡日間  
白髮園人曾習御  
長鳴知是憶關山

虢國夫人學畫眉  
宮門催入許先馳  
春風十里聞鄉澤

新賜金鞍不受騎

畫羅漢

虎嘯千山木葉空  
晴空無處著神通  
蒼龍浴罷軍持水  
閒玩明珠似日紅

題約涼圖

百頃芙蓉水滿隄  
綺窓只在畫橋西  
羊車薄莫過湖曲  
驚起鴛鴦不並棲

題畫

金匱山房詩集卷四  
松戴蓬萊山上雪竹含滄海岸邊風三更月上誰能看  
唯有河東學劍翁

題趙子固山礬瑞香水仙蕙

梁園池館日蒼涼飛蓋追隨憶故鄉澤畔行吟春事晚  
時時駐屐近微香

息齋竹

紫貂蚤解獵圍驂一棹夷猶雪滿簪山雨欲來春樹暗  
盡將情思寫江南

冬至前一日答吳宗師

縣縣微息起黃庭仰望樽桑拂帝青海上鶴來知有意  
手持楊許寫來經

題吳彩鸞所書唐韻

豫章城頭寫韻軒繡簾窄地月娟娟尋常鶴唳霜如水  
書到人間第幾篇

壬申芝亭春帖子

祇今江上無茅屋何日成都有薄田若荷聖恩歸去蚤

東風擊壤慶堯年

髮從更白三千丈身似初生第一春  
久向黃庭留白鶴  
偶隨華蓋駕蒼麟

東風吹雪著髭鬚目力都妨讀舊書  
兒子總堪供稼穡  
故人還許共樵漁

一種芝蘭異楚薪儀如鸞鳳氣如春  
他山借石成瑚璉  
莫負深耕種玉人

華萼樓宴集圖



華萼樓前翠輦來  
寧王吹笛百花開  
夾城誰敢爭馳道  
獨對霓裳進玉盃

為歐陽學士題子昂墨竹

蒼崖倚木雲千尺  
新筍穿林玉一雙  
若到瀟湘聽夜雨  
定知剪燭向西牕

先生歸到歸鴻閣  
閣下應生此竹枝  
定有鳳凰來共宿  
可怜翡翠立多時

送道士趙虛一歸金陵

三月二十五日集侍立延閣上顧問集嘗至金陵否  
集謹對曰嘗到又曰治亭是汝所題往年八九至其  
處新松當長茂矣集謹對曰臣猶是未種松時到也  
近臣奏曰玄妙住持道士趙虛一所種也上曰然又  
顧集曰已陞觀為宮汝知之乎集謹對曰臣奉勅題  
榜賜之矣是日歸虛一來別歸江南即告以聖上不  
忘治亭之意又三日吳大宗師賦詩贈行董先生為  
持卷來索賦因錄所得聖語如上云

春明畫侍奎章閣聖上從容問治亭為報仙都趙貞士  
新松好護萬年青

題子昂春江聽雨圖

越鳥巢南枝所欲得於江湖之上者甚不多也區區  
不余昇覩此慨然

憶昔江湖聽雨眠翩翩歸鴈度春前數株古木依茅舍  
老去何年踏釣船

賦思州田氏楊夫人栢舟堂

白髮高堂晝霧昏  
自將忠義教兒孫  
邊傍種得千株柳  
春雨深深荷主恩

次韻杜德常典籤秋日西山有感

落日龍舟山下回  
寺門依舊對山開  
霜凋碧樹烟生草  
從此頻傷八月來

百頃芙蓉野水光  
石梁秋日度流香  
空遺玉座臨高閣  
只有金仙住上方

閣上露華生翡翠  
潭陰日色射金虬  
舊時車駕迎風動

此日闌干傍水流

每進文章出殿遲  
日華西轉萬年枝  
甘泉罷幸揚雄老  
滿鬢秋風不受吹

題畫

柯敬仲  
雜畫

夢裏江南憶舊遊  
明璫翠佩不勝愁  
一鉤纖月清如水  
吹笛何人共綵舟

黃筌芙蓉乳狗

西旅初聞效貢來  
金毛覆地不凡材  
騶虞麟趾同靈囿

抱子花陰卧石苔

題柯敬仲畫

牽牛引蔓上棠梨上有幽禽夜夜栖  
自有秋風動疎竹  
江南落月不須啼

題蔡端明蘇東坡墨蹟後

天際烏雲含雨重樓前紅日照山明  
嵩陽道士今何在青眼看人萬里情  
此蔡君謨夢中詩也僕在錢塘  
一日謁陳述古邀余飲堂前小閣中壁上小書一絕

君謨真跡也綽約新嬌生眼底侵尋舊事上眉尖問  
君別後愁多少得似春潮夜夜添又有人和云長垂  
玉筯殘粧臉肯為金釵露指尖萬斛閒愁何日盡一  
分真態為誰添二詩皆可觀後詩不知誰作也杭州  
營籍周韶多蓄竒茗嘗與君謨鬪勝韶又知作詩子  
容過杭述古飲之韶泣求落籍子容曰可作一絕韶  
援筆立成曰隴上巢空歲月驚忍看回首白梳翎開  
籠若放雪衣女長念觀音般若經韶時有服衣白一

坐嗟嘆遂落籍同輩皆有詩送之二人最善胡楚云  
淡粧輕素鶴翎紅移入朱闌便不同應笑西園舊桃  
李強勻顏色待春風龍靚云桃花流水本無塵一落  
人間幾度春解佩暫酬交甫意濯纓還見武陵人固  
知杭人多慧也

祇今誰是錢塘守頗解湖中宿畫船曉起鬪茶龍井上

花開陌上載嬋娟

白樂天蔡君謨陳述古蘇子瞻皆杭守也

老却眉山長帽翁茶烟輕颺鬢絲風錦囊舊賜龍團在



誰為分泉落月中

三生石上舊精魂邂逅相逢莫重論縱有繡囊留別恨  
已無明鏡著啼痕

能言學得妙蓮華贏得春風對客誇乞食衲衣渾未老  
為題靈塔向金沙

丹丘柯敬仲多蓄魏晉法書至宋人書殆百十  
函隨以與人弗留也他日獨見此軸在几格間  
甚怪之及取觀則吾坡翁書蔡君謨夢中詩及

守居閣中舊題也第三詩以為不知何人作其  
軒轅彌明之流與陳太守放營妓三詩亦辱翁  
翰墨流傳至今亦有緣耶卷後多佳紙敬仲求  
集作詩識其後賦此四首是日試郭岷墨但目  
疾轉深不復能作字又知年歲後雖若此者亦  
尚能作否臨楮慨然至順辛未二月望日蜀人  
虞集書

題著色山圖

巫山空翠濕人衣  
玉笛凌虛韻轉微  
宋玉多情今老矣  
閒雲閒雨是耶非

題東坡帖

東坡先生書少陵翁負薪行筆力與辭氣同一高古  
憶在江上聞舟人竹枝一首謾識於此

魚復浦前春水生  
負薪渡江初月明  
憑郎莫下巫峽去  
楚王宮殿在專城

題畫

張彥輔  
小景

山下吳王避暑宮  
宮前浪起白蘋風  
抱琴響屨廊頭去  
多是扁舟笠澤翁

題李氏青溪精舍

昔逢李白青溪上  
醉著宮花紫綺袍  
松雪落雲迴晚櫂  
海風吹月見秋毫

題李氏浩然堂

水滿青溪花滿蘂  
浩然堂上挹春風  
小車還過溪頭去  
徧看青山似洛中

聽雪軒

樓前宿鷺起星河近歲江南雪轉多  
投老鍾山寒不寐  
滿山松竹夜如何

放鶴亭

山人不受北山移  
春雨開田種紫芝  
昨日華陽真逸到  
借令過海問安期

臘日偶題

大藥無功卦氣銷  
等閒雙鬢雪飄蕭  
東家釀得黃精酒

說道凌晨許見招

舊時燕子尾  
綫綫重覓新巢  
冷未堪為報  
道人歸去也  
杏花春雨在江南

無題

夏簟琅玕冷於水  
綠鞵烹魚手操匕  
西風歸燕杏梁深  
恨不身先貴人死

與陳升海

門外大風都不起  
牕前卷書淨於水  
匡廬道士上清來

吹笛數聲月明裏

與陳道士

門外大風吹樹倒  
牕下燒香禮黃老  
日午誦徹大洞經  
白鶴隨人啄瑤草

題扇與周幹臣

玉疊松花蜜餅香  
龍珠星顆露盤涼  
遙知環碧樓中坐  
翠竹蒼松夏日長

樂府

次韻禮院孟子周僉院秋夜曲二疊

天闊秋高初夜長  
浮塵銷盡霧蒼茫  
澄澄孤月轉危墻  
金井有聲惟墜露  
玉階無色乍疑霜  
不聞人語只吟螢  
風力清嚴掃莫煙  
纖塵不碍月嬋娟  
太虛那得有中邊  
大地山河空復影  
九霄宮闕舊無傳  
幾承劔氣一飄然  
招熊少府

南阜小亭臺薄有山花  
取次開寄語多情熊少府  
晴也須來雨也須來  
隨意且銜盃  
莫惜春衣坐綠苔  
若待明



朝風雨過人在天涯春在天涯

廬山尋真觀題法曲導引

闌干曲正面碧崔嵬嵐氣著衣成紫霧墨香橫壁長蒼  
苔柏影掃空臺 江海客欲去更徘徊霧鬢雲鬢何處  
在風泉雪磴幾時來鶴翅九秋開

題梅花寒雀圖

殘雪曉牕外幽禽小春聲初動苔枝裊花落知多少  
春起早苦被東風惱綠陰青子歸來好滿徑生芳草

柳梢青題揚補之梅花

至順癸酉立春客有持逃禪翁此卷相示清潤蘊藉  
使人意消因所題柳梢青調亦賦一首云

從別幽華玉堂金馬十載忘家橫幅踈枝如逢舊識同  
在天涯 荒村茅屋欹斜待歸去重尋釣槎解卻絲鉤  
青鞋藜杖翠竹江沙

風入松

畫堂紅袖倚清酣華髮不勝簪幾回晚直金鑾殿東風

軟花裏停驂書詔許傳宮燭香羅初剪朝衫 御溝水泮  
水接藍飛燕又呢喃重重簾幙寒猶在憑誰寄金字泥  
緘為報先生歸也杏花春雨江南

頌

皇太子受寶頌 有序

臣某等敬覩皇太子受寶於行幄謹再拜稽首而言曰  
臣聞古之所謂能以天下讓者審幾於先事謂之至德  
既勸而庸異謂之予賢是皆人道之常而未若今日之

盛者也我皇太子以仁文之資智勇之德當撥亂反正以纘祖宗之統則躬當大難嬰犯霜露而不辭及功成治定既膺厯服之歸則推奉聖兄謙居儲貳而不伐剛明之斷堅於金石而無變素定之誠質諸天地而無疑求仁得仁若處固有樂道忘勢訢然無為此實帝王之所難能古昔之所未有而卓然特見於前後千萬世之內者也臣嘗讀周易而觀於乾龍之象自潛自躍時升位異九五天飛中正極矣益進而上庸知退乎而仲尼

之讚上九曰唯聖人知進退之正言非聖人不能及此  
噫仲尼發此義於千五百年之前而昉見其事於聖代  
宗社生靈萬世無疆之福也於乎盛哉臣等幸以文學  
得備延閣之顧問親逢盛禮爰敢作頌以獻頌曰

於穆皇儲文武聖明於赫大帝受命輯成天運日行既明  
既健神交意孚曾是脩遠帝載龍旂其行遲遲萬民僕來  
皇儲有思載思載瞻于廬于旅式好在原莫敢寧處風  
雨孔時道無游塵肅肅鑿車通宵及晨帝曰勞止毋趣

行邁會言近止交喜更慨灤陽之京世皇所營我母即  
安次於郊坰坰有豐草雨露既渥差駟于牧繁纓濯濯  
皇儲攸止百靈具扶群臣受詔奉寶來趣維時韞櫝龍  
光上燭祖宗之傳景命攸屬寶來自天追琢有章卿雲  
隨之五色景芒有親有尊有友有愛以承武皇聖孝斯  
在古人有言兄弟家邦咨爾臣庶於乎勿忘史臣作頌  
丕昭盛德既壽以昌子孫千億

郊祀慶成頌

奎章閣大學士光祿大夫臣呼都克婁都哩默色等言臣  
聞天子有天德則克當天心以享天命故其為禮必親  
祀上帝而尊祖以配之所以明乎大寶之位付受繼承  
之公至誠而無妄者也粵若至順元年十月辛酉親祀  
南郊前一日大駕出次郊所天光低徊陽煦充達冰釋  
于澤風不鳴條群臣駿奔百靈後先其在齋宮也端拱  
無為致思純一神物表見雲氣發輝五采郁紛彌綸會  
際人神之感已兆于斯至于望舒方中星緯環列太和

磅礴如時在春降玄水於方諸明燿火於紫陞奉常告  
具侍中奏嚴玄裘迺御匏勺斯舉奠圭升燎上帝臨饗  
有神光以致祥出景星以昭德熙事備成坤乾瞻暉乃  
還次于幄殿將迎暎於暘谷應龍噓其重潤若霧絢乎  
曾霄天子又出次而拜貺焉於是公卿大臣奉觴上壽  
各陳其說以贊休嘉天子曰嘻予以天地祖宗之靈克  
正統緒君臨兆人凡所以昭事上帝者豈私朕躬哉予  
惟對越億萬年而無斁者予何敢不勉於戲聖人之心



天之心也故感應之速如此敢再拜稽首而獻頌曰  
惟皇建國辨方正位相其南東吉土立時象圜于穹因  
高于地稽古有作以事上帝昔我皇祖受命自天報祭  
之始以質為虔土宇闢章彌文日宣作樂告成式禮弗  
愆赫赫世祖百度咸秩成廟繼志莫此郊域於皇武考  
敬恭翼翼升配太祖貽我憲則禮已始興命彼儒臣酌  
今之宜考古于文玉帛犧盛越席陶尊將命寔來則有  
司存人習見聞曰茲既備惟我天子聰明睿知曰惟事

天匪躬莫致既裸於廟又議饗帝自我踐阼于今三年  
雨暘若時稼穡庶蕃孰為貳携神發其奸孰為不庭服  
于師于衆賢在廷夙夜濟濟入而陳規出則將美覈名  
以實總綱于紀一人以寧萬國咸理升中于郊實惟其  
時載卜載諏曰惟辛宜載祓載齊我將親祠無敢弗共  
在爾有司大臣岩岩小臣閭閻執衛桓桓執禮循循黎  
民芸芸衆神殷殷載嗟載咨載悅載欣惟明天子與天  
為一不饗亦臨不顯亦式矧茲來郊袞冕佩烏躬酌躬

薦上帝用格明星景光卿雲麗天望之若遙顧依于壇  
當寒而暄陟降舒安行禮孔彰天豈不言皇皇丕基明  
明聖君億萬億年盛德日新以對于天以保于民稽首  
作頌播之韶鈞

銘

劉氏求志齋銘

作事之始志必先立如游有方若射置的苟不素定俟  
張奚適是故君子惟志是尚灼知當為勇往不讓職有

常分匪來外妄其志伊何惟道是義是遠是行求而得  
矣無顯無隱從事在己信美劉君執書受徒惟志之求  
爰表齋居尚審尚端勿惰勿迂

益齋銘

人有不足則必求益小人於利君子於德雖同於求實  
異其物是故學者當慎所擇奪上弗饜賂下自豐日極  
而攻于凶之逢知有未崇道有未隆力致其功美積乃  
躬齋居君子去彼取此善不在大過不在細遷之如風

改之如雷勇無留難尚鑒茲哉

陳伯昇新齋鑿北牆之兩端因空以容匱舍琴書  
則遷而寘焉請虞集為著銘其左銘曰

潛神于深養威于陰蓄之有方奮為雷風君子則之作  
度居琴內容以安外無侈濞時出用之以歌雅南間靖  
永年勿褻以欽

中齋銘

醫者

凡人有生寔受厥中氣有奇偏或害乃躬聖神是惻於

過不及損益寔虛斟酌緩急約其反歸藥石則施中焉  
而止教必有師藝之專成乃墮於術善爾齋居知中之  
極

為潘憲臣作韓氏陶研銘

大陶軒轅范阿泓搏丹合土水火并墮然凝質幾天成  
重厚密澤堅方平發揮文章著光晶磨涅千歲無毀傾  
潘甫愛之如奉盈有虞尚陶爰勒名

泚硯銘為陸友仁作

雲生洮中化完玉膚理縝潤色正綠保而用之吳郡陸  
幹克莊硯銘

毓德深泓達材清明磨礱圭角浸潤光精至溥之澤至  
華之英作為文章以頌治平

潭心銘

馮玉得吳先生所遺詩取詩末潭心字以名齋豫章揭  
曼碩既為之銘玉又欲予銘予奚言哉姑拾其緒餘以  
誦之云耳其辭曰

潭有止水環鄉得中名之曰心天光下容舉體涵空即  
物顯色日行中天委景如的因見而指謂中在茲實無  
限量可擬津涯雖無限量而有自起斂微散殊周流終  
始往來有恒應感不私天施地生莫為而為受而生者  
明通則一請視斯潭汎應何迹齋居君子鑒而新之敬  
以事天不其純而

永思堂銘

先王制禮一本民彝粲乎情文匪強偽為惟均受命心



同理一品節以行至當有則執親之喪哀豈外興國俗  
則亡脫因獨能知能之良隨感以見弗學而合昭厥本  
善善之所推寧止於斯君子曰嘻我其擴之於惟克思  
作聖之事禽獸是歸弗思爾已爾羹爾牆如將見之召  
辱貽名動必致思翼翼新堂孝子所止以宴以享皆思  
之地服惟三年喪則終身死而後已慎哉為人薄化還  
敦詎不由此我銘永思以錫孝子

贊

御書贊

欽天統聖至德誠功大文孝皇帝當龍德之淵潛乃海  
瓊而于邁山川近承於潤色草木咸被於恩光况乎粲  
然雲漢之章照耀下上昔人有言天不愛道地不愛寶  
此之謂歟故武略將軍瓊州安撫副使臣林應瑞之子  
天麒得事上於游泳翰墨之際百拜求所以顯揚其親  
者乃蒙賜之梅邊二字以賁飾其祠堂云至順元年閏  
七月天麒朝於京師來求臣集述贊於下方集拜手稽

首而作贊曰

天日照臨萬物咸遂有生有成何間遠邇顧瞻海邦波  
濤不驚上際於天晨光清明小臣守土靖恭厥職維皇  
念之厥有殊錫維南嘉木梅作其花冰雪之英炫於朝  
霞昔者具胄有若逋者隱於湖山託此為雅今以命之  
輝光其家億萬斯年承我休嘉

御書贊

天子親除吏至御翰墨以賜之此聖恩之至隆文治之

極盛者臣伯單衣被光顯何其榮幸乎臣集謹再拜稽首而述贊曰

宮中之政昔統冢宰出令詔禮陰教斯在維皇念之慎簡乃僚書以命之雲漢於昭凡我民庶敬共率職永懷忠貞以報天德

臨川吳先生畫像贊

業廣而精德周而尊釐析羣言以究斯文章甫玄端書冊左右豈弟君子天錫眉壽

自贊

邈乎千載之下而謂古今一時也眇乎五尺之軀而謂  
天地一體也廓乎不自知其所知也歛乎未能至其所  
至也俛乎若憂非有傷乎其內也泊乎若休無所待乎  
其外也服今人之服食今人之食同乎今之人聊以順  
吾際也讀古人之書頌古人之詩思夫古之人不知老  
之至也

魯子翬僉院畫像贊

篤信聖賢之要力求經傳之遺屹乎山嶽之時粲乎日  
星之垂端居兮憂世之侃侃致用兮儼然而有思繫豈  
弟之君子庶人文兮在茲

奎章閣大學士光祿大夫忽公畫像贊

蒼然松栢之堅貞鎮乎圭璋之粹美慈焉在物之春風  
澹若秋淵之止水抱完器而晚售逢聖明而特起紬往  
哲之緒言貫聲文而同理造膝乎帷幄之密贊化於經  
綸之始致清華於崇朝長詞林以踰記謙自牧以立誠

勇有為於信史受深知於明主曰嘉遯之君子開延閣而首名佇嘉言之來啓剛不吐而柔不茹滿知足而高知止著龜宗社之先幾麟鳳治朝之多祉錫眉壽以為期儼丹青之綏履

蘇君真像贊

偉哉蘇君曰子寧父庶有所不取介有所不與赫奕者有所不趨澹泊者有所不去嚴於操持有所不為謹於思慮有所不語以詩書為業而不虛不踈以法令為師

而不深不固此所以用適乎今而行合乎古畫而肖之  
萬一得其心素矣

西夏相幹公畫像贊

有序

公姓幹氏其先靈武人從夏主遷興州世掌夏國史公  
諱道冲字宗聖八歲以尚書中童子舉長通五經為蕃  
漢教授譯論語註別作解義二十卷曰論語小義又作  
周易卜筮斷以其國字書之行於國中至今存焉官至  
其國之中書宰相而歿夏人嘗稱孔子謂至聖文宣帝



是以畫公象列諸從祀其國郡縣之學率是行之夏亡

郡縣廢於兵廟學盡壞獨甘州僅存其迹興州有帝廟

門榜及夏主靈芝歌石刻涼州有殿及廡至元間公之

曾孫雲南廉訪使道明奉詔使過涼州見殿廡有公從

祀遺像歔歔流涕不能去求工人摹而藏諸家延祐間

荆王修廟學盡撤其舊而新之所象亡矣廉訪之孫奎

章閣典籤伊德埒嘗以禮記舉進士從予成均於閣下

又為僚焉間來告曰昔故國崇尚文治先中書與有功

焉國中從祀廟學之像僅存於兵火之餘而泯隊於今日不亦悲夫先世至元所摹像固無恙也願有述焉以貽我後之人乃為錄其事而述贊曰

西夏之盛禮事孔子極其尊親以帝廟祀乃有儒臣蚤究典謨通經同文教其國都遂相其君作服施采顧瞻學宮遺像斯在國廢人遠人鮮克知壞宮改作不聞金絲不忘其親在賢孫子載圖丹青取徵良史

天根子贊有序

天根子者金華葉審思先生也先生生長富貴家人世  
之樂略已足備而自幼求道甚切徧歷諸方年四十餘  
始克盡屏諸累往來閩粵間大山叢林草屋石室蕭然  
獨居宴坐定息或累數千晝夜人有疾癘水旱殃怪之  
屬強起之亦欣然往應如其禱而初無所為也有西域  
僧自海上至海上人長老識其為二三百歲人人扣其  
道不可得見先生獨喜而告之曰海岸有草與子採之  
鬻瀕立成黃金先生笑而不受它日又曰行吾所能壽

千百歲不足為多吾久擇人授之無如子者先生又不  
受僧嘆曰吾先佛所謂大乘根器者子聞諸莆田陳衆  
仲者如此至順二年聞有天根子比游醫無閭之山訪  
其友蘄子訓之徒子解后見之則先生也子從問天根  
之說得其言而次第之作天根子贊贊曰

忽乎其乾墮乎其坤氣聲軋摩營霸吐吞孰鼓其橐為  
此翕闢往禪來續生以不息君子湛默求端於初視聽  
內收返旋中虛巍巍尊高至極之極能生天地以及萬

物譬之於龍歛微保沖縣縣來升體完用充出入百為私  
智妄作歸求有得不矜不忤無以喻之命曰天根形銷  
名亡獨此之存迺繇金華去之海上神明恬愉玩此無  
象瑤琴翠蕤枝葉扶疏靈風鬱迴光儀發舒累累重山  
日出醴露茂育無方以長終古

索馳圖贊

皇武肇迹宛宛龍漠其居其康輯乘為郭有服維駝礪  
肉載崑毳旃帷房倬輓篔簹軋軋千里載泉于橐黃頭

羔裘騎引顧却人習見聞聖獨有作深宮穆清思詔勤  
約手著厥初伊勞匪樂公劉纘稷于邠式廓畏饑啓行  
致祚八百史臣作雅稽古允若

大象圖贊

皇帝畫大象二贊皇太子監察御史前典寶少監臣和  
哩台承命裝潢而寶藏之翰林直學士臣集再拜稽首  
而作贊曰

有偉馴象貢自南域倬草鏤錫路車是服維皇在輿游

目於式任重持安賦力知德燕閒以思寫之几格天章  
龍文臻妙造極嗟爾微勞尚軫宸臆師武臣能有不察  
識若稽庖犧受圖布畫遠取不遺以啓神易擬茲形容  
克配古昔臣用述贊與世作則

謝靈運小像贊

刊山木以遐眺抗浮雲而脫屣望高秋兮極浦見夫容  
之出水

道園學古錄卷四



謹案卷三第二十六頁前六行拜珠舊作拜住今  
改後仿此

卷四第二十五頁前一行呼都克婁都哩默色舊  
作忽都魯都兒迷失今改後仿此 三十四頁

前七行伊德埒舊作玉都倫今改 三十六頁  
後五行六行和哩台舊作忽禮臺今改





總校官庶吉士臣張能照

校對官編修臣楊壽楠

校對官編修臣馬啟泰

謄錄監生臣夏清和

謄錄監生臣王錡